

Anrhegion Nadolig rhad i'w cyflwyno i blant er mwyn rhannu stori'r Nadolig

Bob blwyddyn cyhoeddir nifer o lyfrynnau a chomics rhad, fel y gall eglwysi eu prynu a'u rhannu'n rhad ac am ddim mewn ysgolion ac yn y gymuned. Ar gyfer 2021 mae dewis o bum cyfrol, gyda chyflenwadau ar gael am brisiau rhesymol – o 30c i £1 y copi.



Yr Addewid Amhosibl

Mae'r gyfrol fach hwylus hon yn ffrwyth cydweithio rhwng Cymdeithas y Beibl a Chyhoeddiadau'r Gair. Cymerwyd adran stori'r Nadolig o'r gyfrol *Stori'r Fwya'r Byd* gan Bob Hartman, gan ei darlunio mewn lliw a'i hanimeiddio ar gyfer creu llyfryn a ffilm *Yr Addewid Amhosibl*. Adroddir hanes y Nadolig yn hwyliog ac mewn arddull sy'n llawn hiwmor, a braf oedd cael Casia William i fod yn lleisydd ar gyfer y ffilm Gymraeg. Er mai stori'r Nadolig yw'r brif stori, mae'r gyfrol hefyd yn mynd ymlaen i sôn am holl fywyd Iesu a'i bwrpas yn dod i'n byd.

Dyma dudalen olaf y llyfryn:

Ond dim ond dechrau'r hanes oedd ei eni. Mae'r Beibl yn mynd ymlaen i sôn amdano yn iacháu'r sâl, bwydo'r newynog a chroesawu'r rhai nad oedd eraill yn eu hoffi – a hynny er mwyn dangos sut beth oedd bywyd yn nheyrnas Dduw. Mae'n cysylltu ymlaen â'i farwolaeth, lle trechodd ei aberth bŵer drygioni trwy ddileu'r cywilydd a'r euogrydd a'r gosb am bob peth anghywir y byddai unrhyw un byth yn ei wneud. Mae'n sôn am ei atgyfodiad a sut y paratodd ar gyfer ein hatgyfodiad ni. Mae'n sôn am ei esgyniad, a sut mae'n teyrnasu wrth ochr Duw hyd heddiw. Ac mae'n sôn am ddyfodiad yr Ysbyrd Glân – sy'n byw y tu mewn i bawb sy'n ei ddilyn ac yn ein helpu i fyw yn ôl ei esiampl ef. Ac yn olaf mae'n sôn am ba mor bwysig ydy Iesu i'w fywyd di, ac i fi, ac i bob un arall yn y byd heddiw, a hyd dragwyddoldeb, pan fydd Duw yn creu nefoedd newydd a daear newydd, lle y bydd yntau yn frenin am byth!

Mae'r gyfrol ar gael am £2, ond trwy brynu cyflenwad ohonynt i'w rhannu am ddim yn y gymuned mae modd archebu copïau am 50c yr un. Cysylltwch ag aled@ysgolsul.com am fwy o wybodaeth.



Cerdd y Nadolig

Pam mae plant yn gwisgo i fyny mewn dramâu'r geni ac yn casglu o amgylch doli babi mewn mymryn o wair? Pwy oedd y babi hwnnw? Beth wnaeth e? A beth oedd pwynt hyn i gyd? Mae'r atebion i'w cael yn y gyfrol *Cerdd y Nadolig* gan Gymdeithas y Beibl.

Yn y gyfrol ceir cerdd hyfryd gan Bob Hartman, sy'n ailadrodd y stori fwyaf a adroddwyd erioed mewn ffordd newydd a hudolus fydd yn swyno plant ifanc. Mae'n stori sy'n sôn am Dduw, amdanon ni ac am bopeth yn y byd. Addaswyd y gerdd i'r Gymraeg gan Bethan Jones, ac mae'r gyfrol yn cynnwys lluniau lliwgar gan Honor Ayers. Mae'n ddelfrydol i'w darllen i blant ifanc ac i deuluoedd. Mae modd gwyltio ffilm o'r stori hon hefyd ar wefan cymdeithasybeibl.cymru/cerddynadolig

Mae'r gyfrol ar gael am £2, ond trwy brynu cyflenwad ohonynt i'w rhannu am ddim yn y gymuned mae modd archebu copïau am 50c yr un. Am ragor o wybodaeth, cysylltwch ag: aled@ysgolsul.com.

Un o rinweddau'r gerdd yw ei bod yn mynd y tu hwnt i stori'r Nadolig, gan roi'r hanes mewn cyd-destun ehangach. Sylwer ar y diweddgllo:

Ond daeth Iesu yn ôl, yn ôl o'r bedd!

A dod at ei ffrindiau, a'u cyfarch mewn hedd,

'Adroddwch fy stori wrth bawb yn y byd
Fy mod i am faddau eu drygioni i gyd
A'ch gosod yn rhydd i fyw fel gwnes i
I garu eich ffrindiau – a'ch gelynion chi.'
Dyna pam y daeth Dolig – croesawn y dydd –

Y canu, y twrci, y ddrama a'r ffydd,
Wrth wisgo angyllion a chael ambell degan

Nid oherwydd y baban bach diddan
Ond y dyn a dyfodd a rhoi i ni'r ateb
Sy'n newid bywydau a lladd hen gasineb,

I fyw a charu – dyna gynllun Duw i ni
A throï'r hyn sy'n gas yn arwydd o ras
A throï'r hyn sy'n gas ... yn arwydd o ras!

Comics Beiblaidd


Mae dau gomic Beiblaidd ar gyfer y Nadolig hefyd ar gael i'w cyflwyno i blant. Maen nhw'n ddelfrydol ar gyfer plant oed cynradd, ac ar gael am y pris arbennig o 60c yr un mewn pecynnau o 10, neu 99c yr un. Gellir hefyd archebu pecynnau mawr o 50 am £25 neu 100 am £40.

Comic Beiblaidd Arwyr Ancora

Mae *Arwyr Ancora: Comic Beiblaidd y Nadolig* yn addas ar gyfer plant 7 i 11 oed. Mae'r comic hwn hefyd yn cyflwyno plant i ap Beiblaidd Arwyr Ancora, sydd ar gael yn Gymraeg.

Comic Beiblaidd Nadolig


Comic lliwgar, 16 tudalen, sy'n cynnwys stori'r Nadolig ar ffurf comic a thudalennau sy'n cynnwys cwis Nadolig, ffeithiau am y Nadolig ac amrywiol bosau.



Fy Llyfr Nadolig Cyntaf

Yn ogystal, ar gyfer y plant lleiaf mae llyfr lliwgar yn adrodd hanes stori'r Nadolig, sef *Fy Llyfr Nadolig Cyntaf*. Cyfrol yn cynnwys testun ar ffurf odl wedi ei greu'n arbennig gan Anni Llŷn, cyn Fardd Plant Cymru. Mae'n addas ar gyfer plant 3 i 7 oed, ac ar gael am £1.99 yr un. Gellir hefyd archebu pecynnau o 25 neu fwy am £1 yr un.

Mwy o wybodaeth ar www.ysgolsul.com neu drwy ebostio aled@ysgolsul.com



Beiblau a llyfrau Nadolig i blant


Dros y misoedd diwethaf cyhoeddwyd nifer o Feiblau lliw newydd i blant, a hynny yn barod ar gyfer y farchnad Nadolig. Mae'r llyfrau hyn i gyd bellach ar gael yn eich siop lyfrau Cymraeg neu eich siop lyfrau Cristnogol leol, neu i'w harchebu'n uniongyrchol drwy'r post gan Gyngor yr Ysgolion Sul.

Gobeithiwn hefyd y bydd darllenwyr *Cenn@d* yn ystyried cyflwyno llyfrau'n anrhegion Nadolig i blant, boed yn wyrion ac wyresau neu blant cymdogion a ffrindiau. Gyda llai a llai o blant bellach yn mynychu ysgolion Sul yn rheolaidd, dyma un ffordd o gyrraedd cenhedlaeth newydd o blant. Dyma gyfle hefyd i gyflwyno anrheg Nadolig arbennig ar ran y capel / yr ysgol Sul i'r plant o dan eich gofal.

Beibl Newydd y Teulu Cyhoeddwyd Beibl lliw newydd yn ystod 2021 sydd wedi'i anelu at y teulu cyfan, sef *Beibl Newydd y Teulu*. Paratowyd hwn gan Bob Hartman, sy'n adnabyddus fel awdur storïau'r cynllun Agor y Llyfr, a'i addasu i'r Gymraeg gan Siân Roberts. Wrth ddarllen y 40 stori sydd yn y casgliad, cewch gyfle i ddyysgu mwy am y cymeriadau lliwgar ac ymateb iddynt gyda'r llyfr ymarferol a difyr hwn i deuluoedd. Ychwanegwyd elfennau rhyngweithiol at y storïau bytholwyrdd er mwyn annog y teulu cyfan i ystyried, trafod a'u cysylltu â'u bywydau nhw eu hunain. Cyflwynir cymeriadau a digwyddiadau, gan ddangos sut mae Duw'n gweithio trwyddyn nhw.


Ceir cyfle hefyd i ystyried sut fydddech chi'n ymateb yn yr un sefyllfa, a beth mae Duw'n dymuno i ni ei wneud heddiw. Mae yma anogaeth i deuluoedd draffod oblygiadau ffydd a sut i wneud Duw yn berthnasol yn ein bywydau wrth fyw o ddydd i ddydd, gan ystyried sut i gynnwys Duw ym mhenderfyniadau'r teulu.

Ceir hefyd syniadau gwerthfawr am bynciau trafod a cheisiadau gweddi y gall y teulu cyfan eu rhannu. Disgrifiwyd y gyfrol fel 'Gwers ysgol Sul mewn bocs' gan fod y stori, y wers a'r anogaeth i gyd yno mewn un gyfrol. A dywedodd un arweinydd ei bod yn 'ffordd hwylus a hawdd o ddilyn cynllun Agor y Llyfr yn y cartref'. Heb os, dyma adnodd gwerthfawr i helpu'r teulu cyfan i draffod rhai o brif storïau'r Beibl, gyda digon o gynnwys yma am flwyddyn gyfan o sesiynau wythnosol. Pris y gyfrol hardd hon yw £13.99.




Stori Fwya'r Byd Cyfrol newydd ar gyfer plant 7-11 oed, eto o waith y storiwr poblogaidd Bob Hartman, ac wedi ei chyfieithu'n feistrolgar gan Meinir Pierce Jones. Mae'r gyfrol wedi ei hysgrifennu yn arddull cyfoes llyfrau Twm Clwyd neu *Dyddiadur Dripsyn*, lle ceir cyfuniad o destun, graffiti, dwdls a lluniau wedi'u plethu â'i gilydd i greu cyfanwaith cyffrous a difyr.

Meddai'r awdur: 'Croeso i'r llyfr GORAU a mwyaf cyffrous y byddwch chi erioed wedi'i ddarllen. Mae'n dechrau cyn y dechreuodd y byd (amser maith yn ôl!) ac mae'n hanes ANHYGOEL sy'n un stori FAWR Feiblaidd, wedi'i chysylltu â saethau a chwestiynau a dwdls difyr. Mae'n llawn criwiau o angylion, gwyrthiau gwefreiddiol, breuddwydion boncyrs ac addewidion amhosibl'. Efallai eich bod wedi clywed rhai o'r straeon hyn o'r blaen, ond ddim cweit wedi eu hadrodd fel yma! Pris y gyfrol yw £8.99.



Y Comic Beiblaidd Anferth Cyfrol newydd arall sy'n mynd â ni ar daith drwy brif hanesion y Beibl, mewn arddull stribed comig poblogaidd.

Meddai'r awdur: 'Croeso i'r comic Beiblaidd anferth! Cofiwch mai yn y Beibl ceir y gwir NEWYDDION DA ac mae'r casgliad hwn o storïau




o'r Hen Destament a'r Newydd yn dod â'r cyfan yn fyw. Gan ei fod ar ffurf comig, bydd yn siŵr o ddal diddordeb ac mae'r lluniau'n hoelio sylw ac yn llawn hiwmor. Daw hyn â'r storïau a chymeriadau'r Beibl yn fyw mewn ffordd a fydd yn aros yn y cof am amser hir.'

Mae'r tîm creadigol yn cynnwys goreuon y byd ym maes comics, gan gynnwys: Mychailo Kazybrid, a fu'n gweithio ar sgriptiau a delweddu cyfres Wallace and Gromit; Jeff Anderson, a fu'n gweithio ar gyfres gomics a theledu'r *Transformers*, y *Beibl Graffeg* a *Minecraft*; Bambos Georgiou o gwmni comics Marvel a D C Thompson Comics (cynhyrchwyr comics fel *Beano* a *Dandy*) a Jesus Barony, sy'n brofiadol ym myd dylunio nofelau graffig i Lego. Mae'r addasiad Cymraeg gan Alun Jones, a phris y gyfrol yw £8.99.

Y Llais Cyfrol newydd ar gyfer rhai yn eu harddegau gan Huw John Hughes. Dyma gyfrol wreiddiol Gymraeg yn olrhain hanes bywyd Iesu, a hynny yn arddull papur newydd tabloid poblogaidd (fel y *Sun* neu'r *Mirror*).

Meddai'r golygydd o'r ddesg newyddion: 'Dros y tair blynedd diwethaf bu gohebwy'r *Llais* yn dilyn Iesu o Nasareth yn ei gynefin yng Ngallilea ac yna ar ei daith olaf i Jerwsalem yn nhalaith Jwdea. Maen nhw wedi bod yn llygad-dystion i wahanol ddigwyddiadau yn ystod ei fywyd ac wedi cael cyfle i holi ei ddisgyblion a'i ddilynwyr yn ogystal â rhai o'i wrthwynebwyr. Cawsant gyfle i bwysa a mesur beth oedd y dylanwadau gwleidyddol a chrefyddol arno a'r modd y bu'r rheiny'n rymdylanwadol ar ei fywyd, yn enwedig yn ystod ei ddyddiau olaf yn Jerwsalem. Mae'r golygydd wedi cywain y digwyddiadau amlycaf yn ei weinidogaeth i un gyfrol. Heb os, mae swm a sylwedd gweinidogaeth Iesu yn crynhoi neges a chrwsâd y *Llais* sef, y papur sy'n troi'r byd a'i ben i waered. Darllenwch a phrofwch drosoch eich hun ond mae 'na rybudd – efallai y bydd ambell ddadansoddiad a dehongliad yn gwbl wahanol i'r hyn yr oeddech yn arfer ei gofio a'i drysori.' Mae'r gyfrol ar gael am £7.99.



I eglwysi neu ysgolion Sul sydd am gyflwyno copïau yn anrhegion i blant, mae Cyngor yr Ysgolion Sul yn cynnig gostyngiadau a thelerau arbennig; gyrrwch e-bost at aled@ysgolsul.com i dderbyn mwy o wybodaeth neu ewch i wefan www.ysgolsul.com